



Inatsisartunut aalajangiiffigisassatut siunnersuutigineqarpoq Naalakker-suisut peqquneqassasut Inatsisartut peqqussutaata nr. 12, 19. November 2007-imeersup Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu, aalajangersakkat allanngortinneqassasut ilaqutariit ataatsit illui tuniniaanermi akitinneqartut kisiisa atorlugit tiguneqarsinnaalersillugit.

(Inatsisartunut ilaasortaq Steen Lynge, Atassut)

(Siullermeenera)

Demokraatini tapersorsorparput sapinngisamik innuttaasut amerlanerpaat namminneq pigisaminnik illoqalernissaat. Piginnittuugaanni illup aserfallattaalinissaanut akisussaaffik anneq pigineqartarpoq. Tamatuma saniatigut illu ileqqaarutitut isigineqarsinnaavoq ingerlaavartumik illumut akiitsut akilersorneqartarmata, tamatuma kinguneranik utoqqalinermi inuuneq oqinnerulersinneqarsinnaavoq illup tuninerani aningaasat atorlugit.

Allatut oqaatigalugu illut nammineq pigisat amerlinissaat taamaallaat pitsaasumik eqqaasinnaavarput.

Illuatungaani ima illut nammineq pigisat amerlisarnissaat ima tapersorsortiginngilarput allaat inuiaqatigiit illuutaat inuinnarnut tunniussuutissallugit. Taamaattumik illunik nioqquteqarnerit ilaat piffissap ingerlanerani pisimasut isornarluinnartutut isiginikuuagut, tassani innuttaasut ilaat inuiaqatigiit inissiaataannik attartortittakkanik pisisarnikummata akikinaarujussuarlugit.

Pingaaruteqarpoq suna tamaat atorlugu qularnaarniassagatsigu niuernerit taamaattut pinngitsoortinnissaat.

Tamanna tunngavigalugu siunnersuuteqartoq isumaqatigaarput oqarmat illup akigata niuernerimi akit atuuttut malissagaat. Pisortanut allatulli imatut peqqinnartumik



tunnaveqartoqartariaqarpoq akisunerpaamik tunisisarnissaq taamaaliornikkut iluanaarutissaq annerpaaq angujumallugu.

Siunnersuummik matumangga akuersinitsigut qularnaassavarput pisortat inissiaataasa attartortittakkat tuninerini niuerfimmi akit atuuttut malinneqartarnissaat, tamannalu tapersorsorparput.

Taamatut oqaaseqarluta siunnersuut Sanaartornermut Ataatsimiititaliamut innersuupparput suliareqqitassanngorlugu.